

ԱՐԱՄ ՂԱՆԱԼԱՆՅԱՆ

1983 թ. հունիսի 9-ին մահացավ Հայկական ՍՍՀ ԳԱ ակադեմիկոս, գիտությունների վաստակավոր գործիչ, բանասիրական գիտությունների դոկտոր, «Պատմա-բանասիրական հանդեսի» գլխավոր խմբագրի տեղակալ Արամ Տիգրանի Ղանալանյանը:



Արամ Ղանալանյանը ծնվել է 1909 թ. փետրվարի 12-ին Ախալցխայում: Ակադեմիկոս Սկզբնական կրթությունը ստացել է ծննդավայրում, իսկ միջնակարգը՝ Թբիլիսիում: 1927 թ. ընդունվել է Երևանի պետական համալսարանի պատմա-գրական ֆակուլտետի լեզվագրական բաժինը: 1932 թ. նա աշխատանքի է անցնում Հայաստանի նյութական կուլտուրայի ինստիտուտում, ապա՝ աշխատում է Հայաստանի կուլտուրայի պատմության, պատմության և գրականության, Արմֆանի լեզվի և գրականության ինստիտուտներում՝ զբաղվելով հայ ժողովրդական բանահյուսության ուսումնասիրությամբ: 1943 թ. Հայկական ՍՍՀ ԳԱ հիմնադրման օրից մինչև իր կյանքի վերջը նա աշխատում էր Մ. Աբեղյանի անվան գրականության ինստիտուտում:

Արամ Ղանալանյանը սովետահայ բանագիտության դպրոցի հիմնադիրներից է: Դեռևս ուսանողության տարիներին՝ 1927—32 թթ. Երևանի պետական համալսարանի պատմա-գրական բաժնում սովորելիս նա առանձին հետաքրքրություն է ցուցաբերում ժողովրդական բանահյուսության նկատմամբ, և այդ առարկայի դասախոս, մեծանուն գիտնական Մ. Աբեղյանի ղեկավարությամբ խորամուխ է լինում հայ բանագի-

տության մեջ: Ուսումնասիրությունից հետո աշխատանքի անցնելով գիտահետազոտական հիմնարկներում, նա զբաղվում է բանագիտական տարբեր խնդիրների ուսումնասիրությամբ: 30-ական թվականներին գրի է առնում «Սասնա ծռեր» ժողովրդական վեպի երկու նոր պատումներ, Մ. Աբեղյանի և Գ. Աբովի հետ կազմում «Սասունցի Դավիթ» հյուսվածո-համահավաք բնագիրը, որ հրատարակվել է մի քանի անգամ և թարգմանվել աշխարհի բազմաթիվ լեզուներով: Հրապարակում է «Սասունցի Դավիթ» և «Սասունցի Դավիթ» պատմիչների կյանքն ու ստեղծագործությունը՝ ուսումնասիրությունները: Նրա մի շարք աշխատություններ նվիրված են բանագիտության տեսության ու պատմության հարցերին, ինչպես՝ «Ժողովրդական բանահյուսության մի քանի հարցեր», «Գարեգին Սրվանձտյան», «Մ. Աբեղյանի կյանքն ու գործունեությունը» և այլն:

Վաստակաշատ բանագետի գիտական հետաքրքրությունների ոլորտում են եղել գեղարվեստական գրականության և բանահյուսության փոխառնությունների խնդիրները: Այս հարցերին են նվիրված «Պոեզիան և ժողովրդական բանահյուսությունը», «Ավետիք Իսահակյանի ստեղծագործության ժողովրդական ակունքները», «Աբովյանը և ժողովրդական բանահյուսությունը», «Սայաթ-Նովայի ստեղծագործության ժողովրդական ակունքները», հետազոտություններ Ղ. Աղայանի, Մ. Նալբանդյանի, Հ. Պարոնյանի, Հ. Թումանյանի, Վ. Սարգսյանի մասին, որոնց մեջ քննարկվում են հայ դասական գրողների կողմից բանահյուսական նյութերի վերամշակման եղանակները և ցույց է տրվում բանարվեստի դերը նրանց ստեղծագործությունների ժողովրդականության գործում:

Արամ Ղանալանյանին իբրև գիտնական առավել հատկանշականը այն է, որ նա ուսումնասիրության նյութ էր դարձնում բանահյուսության այնպիսի տեսակներ, որոնք մինչև այդ ուսումնասիրված չեն եղել: 1937 թ. լույս է տեսնում նրա «Հայ շինականի աշխատանքի երգերը», 1951 թ. «Առածանի» (երկրորդ անգամ՝ 1960 թ.), 1969 թ. «Ավանդադատում» աշխատությունները, որոնցից յուրաքանչյուրը ներկայացնում է բանահյուսական առկա բոլոր նստգիր-նյութերը՝ գիտականորեն խմբավորված, դասակարգված և ենթարկված բազմակողմանի հետազոտության: Այս երկու կոթողային աշխատությունները նրա գիտական վաստակի անգամ են կազմում, և ամեն մեկը մի ծանրակշիռ ներ-

դրում է հայ բանագիտության և առհասարակ հայագիտության մեջ:

«Առաժանին» ժողովրդական առաժանների ու ասացվածքների համահավաք ժողովածու է, այստեղ, առաջին անգամ լինելով, ի մի են հավաքված ու համակարգված հայ ժողովրդի ստեղծած առաժանների ու ասացվածքների հարուստ ժառանգությունը (շուրջ 40.000 առած ու ասացվածք): Ժողովածուի ծավալուն ներածության մեջ Ղանալանյանը բնութագրում է ժողովրդական առաժաններն ու ասացվածքները, պարզում դրանց ստեղծման ժամանակը, բացահայտում հայ ժողովրդի բաղադրական կյանքի, հոգեկան նկարագրի և միջավայրի արտացոլումը առաժանների մեջ, տարրերակում ընդհանուրը, փոխառյալը և տեղական ստեղծագործությունները, վերլուծում ներքանց զաղափարական ընդհանրությունները, բնականում լեզվի ու արվեստի հարցերը:

«Ավանդապատումը» բովանդակում է ավելի քան 900 ավանդություններ, իրենց 400 տարրերակներով, որոնք բաղված են հարյուրավոր սույուգիր ու ձևագիր զանազան աղբյուրներից՝ միջնադարյան մատենագիրների երկերից, առգրավական, բանահյուսական ժողովածուներից, հնախոսական, տեղագրական և ուղեգրական աշխատություններից: Բնագրին նախորդում է ընդարձակ Ուսումնասիրությունը, ուր հեղինակը տարրերագատելով ավանդությունները բանարվեստի մյուս տեսակներից, բնորոշում է դրանք որպես բանավոր արձակի փոքր ծավալի ստեղծագործություններ, որոնց մեջ արտացոլված են երկրի բնաշխարհի բնորոշ առանձնահատկությունները՝ սիրտորին կապված ու գուգորդված ժողովրդական հավատալիքների, ժողովրդի կենցաղի, նրա սոցիալ-տնտեսական, աշխատանքային, հասարակական, բաղադրական, մշակութային կյանքի երևույթների ու հասկացությունների հետ:

Այս աշխատություններում արգասավոր դիտական, հենվելով դասական բանագիտության նվաճումների վրա, առաջադրել է ժողովրդական

բանահյուսության ուղարձանների հրապարակման և հետազոտության իր սկզբունքները, որոնք լայն նանաչում են զտել բանագիտության մեջ:

Գիտահետազոտական աշխատանքներին զուգընթաց Արամ Ղանալանյանը երկար տարիներ զբաղվել է նաև գիտա-մանկավարժական գործունեությամբ: Նա ծրեանի պետական համալսարանում, Խ. Արովյանի անվան և հեռակա մանկավարժական ինստիտուտներում դասախոսել է հայ ժողովրդական բանահյուսության առարկան, ստեղծելով հայ բանագիտության մշակված դասընթաց, որի մի քանի պրակները լույս են տեսել 1945—46 թվականներին: Նա է հիմնադրել Հայկական ՍՍՀ գիտությունների ակադեմիայի գրականության ինստիտուտի ժողովրդական բանահյուսության բաժինը, որի ղեկավարն է եղել 1943—1959 թվականներին: Նրա ղեկավարությամբ է աճել ու զարգացել հայ բանագետների այժմյան սերունդը:

Դեռևս շատ սպասելիքներ ունեն հայ բանագիտությունը Արամ Ղանալանյանից՝ քանքարավոր գիտնականը շարունակում էր նույնքան ինքնամոռաց ու նուանդով ստեղծագործել, պատրաստում էր «Մանրապատում» և «Երգիծապատում» աշխատությունները, որոնք, դժբախտաբար, անավարտ մնացին:

Սկսած 1965 թվականից Արամ Ղանալանյանը «Պատմա-բանասիրական հանդեսի» գլխավոր խմբագրի տեղակալն էր: Նա մեծ նվիրումով իր ջանքերը ի սպաս էր դնում «Հանդեսի» աշխատանքներին, ամենալին բարեխղճությամբ խմբագրում ներկայացված հայագիտական հոդվածները, հոգատարությամբ խորհուրդներ էր տալիս հեղինակներին, օգնում, ուղղություն տալիս նրանց: Հայագիտության մեծ երախտավորը, գիտության նվիրյալը միավաճանակ ազնիվ ու անաշառ քաղաքացու կերպար էր:

Է. Ա. ՊԻՎԱՋՅԱՆ